

# Tableau d'honneur vun de Lëtzebuenger Scouten (LS) 1940 - 1945

Den 23. August 1940, am Moment wou de Verband vun de Lëtzebuenger Scouten opgeléist ginn ass, waren 1.475 Memberen ageschriwwen (Wëllefcher, Scouten, Rover, Cheftainen, Cheffen an Aumôniers).

Vun deene Memberen sinn der :

- 27 exekutéiert ginn
- 8 am Prisong gestuerwen
- 66 op der Front leie bliwwen
- 27 si verschwonnen
- 74 an de Konzentratiounslageren agespaart ginn
- 91 an de Prisong agespaart ginn
- 56 an Nazilageren deportéiert ginn
- 476 an d'Wehrmacht zwangsrekrutéiert ginn
- 121 an de Maquis oder an eng alliéiert Arméi gaangen oder si Refractaire ginn

Bal 500 Memberen vum Verband waren an der aktiver Resistenz. Eng ganz Parti si vun hire Funktiounen ofgesat ginn, hunn aus der Wehrmacht desertéiert oder sinn aus patriotesche Grënn aus hire Lycéën erausgehäit ginn.

Et muss een och bedenken, dass verschidde Memberen duerch méi wi eng Statioun vun der Naziverfolgung hu missen goen.

Dësen Tableau ass net komplett, well en nëmmen di aktiv Scouten vu 1940 opzielt. Fir ganz komplett ze sinn, misst een en Tableau vun den erwuessene Scouten opstellen.

„J'ai coupé les roses dans mon jardin...  
mais les racines sont toujours dans la terre...“

Lord Baden-Powell

# Lëtzebuenger Scouten (LS) an der Resistenz 1940-1945 a.s.b.l.


Am Juli 2003 hunn e Grapp voll Leit sech zesumme fonnt fir d'ASBL Lëtzebuenger Scouten (LS) an der Resistenz 1940-1945 a.s.b.l. ze grënnen. Soumat huet d'Initiativ déi scho vun 1946 u bestanen huet en offizielle Kader kritt.



Sënn an Zweck vun dëser ASBL sinn:

- Duerch Aktivitéiten, Recherchen an Publikatiounen d'Engagement vun de Lëtzebuenger Scouten (LS) géint den Nazi-Okkupant während dem 2. Weltkrich an Erënnerung ze halen.
- Témoignagen an Dokumenter zesummen ze droen, déi d'Roll vun den LS während de Krichsjoeren erëmispigelen.
- D'Lëtzebuenger Guiden a Scouten an aner Organisatiounen bei hieren Aktivitéiten déi sech op d'Resistenz bezéien ze ënnerstëtzen.
- D'Interessen vun de Resistenzler an hieren Nokommen ze verdedegen.

Wann Dir interesséiert sidd fir an der ASBL matzeschaffen oder Material, resp. Dokumenter hutt, déi eis interesséiere kéinnt, dann mellt Iech bei eis:





## De Verband vun de Lëtzebuenger Scouten (LS) am zweete Weltkrich

Den 2. September 1939, hunn däitsch Truppen Polen iwwerfall. Doduerch waren d'Alliéiert, England a Frankräich laut Ofkommes mat Polen engagéiert, Däitschland de Krich ze erklären, deen no an no zum 2. Weltkrich ausgewuess ass. Eist Land stong virun enger ongewässer Zukunft.


An dëser Perspektiv stong de Chefdag vun de Lëtzebuenger Scouten de 16. September 1939 ënnert dem Motto „DER HEEMECHT ZE DENGEN“. Den deemolege Commissaire Général Aloyse Hentgen, huet en Appel un d'Bereitschaft vun alle Chef a Rover gericht an ausgeruff: „D'Scoute si mobiliséiert“. Dorop huet eng grouss Zuel vu Scouten d'Eischthëllefscoursë vum Roude Kräiz besicht.



20.2.1941 Chef aus dem Süddistrikt ënnerwee an d'Kathedral

An der Nuecht vum 9. op den 10. Mee 1940, hunn dem Hitler seng Arméien och eist Land iwwerrannt an dat trotz offiziellen Deklaratiounen deen Dag virdrun,

d'Neutralitéit vu Lëtzebuerg ze respektéieren. Vun do u bis d'Joer 1945 gouf eist klengt a friddlecht Land ënnerdréckt an terroriséiert mam Zil, Lëtzebuerg fräiwëlleg oder gezwongen ze annektéieren. Fir dat méi séier ze realiséieren, gouf eist Land am August 1940 ënnert d'Zivilverwaltung gestallt, mat engem Gauleiter un der Spëtzt.



Chapelle „Notre-Dame des Bois“

Mee d'lëtzebuenger Vollek huet der Nazityrannei d'Stir gebueden. Hei e Saz aus dem „Sicherheits-Bericht“ vum 25. Juni 1940, deen an eise Statsarchiv ënner AEL-SD/A4/Bl.3 enregistréiert ass an deem d'Haltung vun den LS den Nazi vis-à-vis, vun Ufank un esou festhält: „Innerhalb der Schulen und Internate zeigen sich nach wie vor die katholische Pfadfinder als die fanatischsten Gegner deutsch-freundlich gesinnter Schüler“. Aus der individueller Resistenz ass gläich déi organiséiert Resistenz entstan. Op Initiativ vun den dräi Distriktscommissaire vun de Lëtzebuenger Scouten, Tony NOESEN (Norden), Georges EVERLING (Zentrum) a Jang MULLER (Süden), de 15. Juli 1940 ass di éischt Lëtzebuenger LS-Resistenzorganisatioun op d'Bee gesat ginn. Kuerz duerno, de 15. August 1940, koumen iwwer 40 Chef a Rover aus dem Süddistrikt zu Esch am Wëllefcherssall

ënnert der Grenzer Kierch zesummen, wou beschloss gouf, Resistenz ze leeschten, mee d'Bouwen aus deeër geféierlecher Saach erauszehalen. Bei dëser Geleeënheet hu si hiert Scoutsverspriechen op de lëtzebuenger Fändel erneiert. Dat war deen éischten Akt, vun der éischer Resistenzorganisatioun.

De Scoutismus war fir déi jonk Männer eng gutt Schoul, well de Grënner a Chef Robert BADEN POWELL, si duerch seng Erziéungsmethod ganz spezifesch op d'Liewen an op hir Afferbereitschaft préparéiert hat. Esou waren si sech bewusst, wat dat gewotent „Spill“, op dat si sech agelooss hunn, mat sech bréngen kënnt. Well dee klengste Feeler konnt d'Deportatioun an e KZ, d'Émsidlungslager mat der Famill, d'Konfiskéiere vum Verméigen, laang Prisongsstrofen an esouguer d'Doudestrof mat hire brutalste Vatiante no sech zéien. „Mir waren eis am kloren iwwert d'Brutalitéit vum Nazigesetz an dach hu bis op wéineg Ausnamen ganz vill vun eise Chef, Aumônieren a Rover, vill Cheftainen an och Scouten sech do wou et drop ukoum, géint den Naziterror gestäipt...“



D'Scoutsresistenzlerkapell an der Grenzer Kierch zu Esch